



清刻龍藏佛說法變相圖

六經同卷

孝八

佛說中心經

佛說見正經

佛說大魚事經

佛說阿難七夢經

佛說呵鵬阿那含經

佛說燈指因緣經

佛說中心經

東晉西域沙門竺曇無蘭譯

聞如是一時佛在舍衛國祇樹給孤獨園是時諸菩薩四輩弟子天龍鬼神帝王人民日會聽經佛右面比丘名曰目連神通妙達智

如虛空隨時變化權智並行普爲濟衆數如恒沙諸天稽首靡不師仰佛告目連彼有大國去斯八千處在邊境不覩三尊之至靈希聞如來無所著正真等覺神妙清化習於顛倒衆邪之行以爲真諦王及臣民奉事梵志等五百人各有五通力能移山駐流分身變化國有大山塞民徑路舉國患之王以山爲民艱難具向梵志說之梵志答曰吾等自爲民除患王無感焉即繞山坐各一其心以道定力山起欲移佛告目連汝往彼國現道神化長度梵志濟其人民令遠三塗永處福堂目連受教承佛威神尋路放光過絕日明懸處虛空當其山頂山爲不動梵志驚曰此山已起誰過之乎日又無光此將有異中有明者以道定意觀衆弟子心誰穢濁者令山不

移觀見諸心普有道淨國榮寶色不穢其心仰頭觀見觀一沙門當其山上梵志僉曰正是瞿曇弟子所爲梵志呼曰王令吾等爲民除患汝抑之爲目連答曰吾自懸虛誰抑汝山梵志三進道力欲令山移山又三下遂成平地梵志顧相謂曰夫有明達道德深者即吾等師咸興正服稽首敬白願爲弟子示吾極靈目連答曰汝等欲去冥就明者善吾有尊師號曰無上正真天中之天爲一切智汝等尋吾往至佛所梵志答曰佛之導化寧踰於師乎目連曰佛以須彌爲芥子吾以芥子爲須彌歎佛德畢曰汝等尋吾後目連接諸梵志猶若壯士屈伸臂頃即在佛前具陳其情白佛言吾承無上正真之化化諸梵志斯等內外以淨猶若新氎易可爲色唯願天尊

蕩其微垢令成眞淨梵志見佛心開意喜皆作沙門佛告諸比丘我爲汝曹說經上語亦善中語亦善下語亦善語中深說度世之道正心爲本聽我所言使後世傳行之諸比丘皆叉手受教佛言人身有五賊牽人入惡道何等爲五一者色二者痛癢三者思想四者生死五者識是五者人所常念佛言人身常爲目所欺爲耳所欺爲鼻所欺爲口所欺目但能見不能聽耳但能聞不能見鼻但能知臭香不能聞口但能知味不能知香臭身但能知寒溫不能知味五者皆屬心三心爲本佛告諸比丘欲求道者當端汝心人從癡故隨十二因緣便有生死何等爲十二一者本爲癡二者行三者識四者名色五者六入六者觸七者痛八者愛九者取十者有十一者生

十二者死施行善者復得爲人施行惡者入泥犁泥犁薜荔畜生鬼神中佛坐思念人癡故便有生死何等爲癡本從癡中來今生爲人復癡心不解目不開不知死趣何道見佛不問見經不讀見沙門不承事不信道德見父母不敬不念世間苦不知泥犁中考治劇是名爲癡故有生死不息人生死如呼吸之間脆不過於人命人身中有三事身死識去心去意去是三者常相追逐施行惡者入泥犁泥犁禽獸薜荔畜生鬼神中施行善者三亦相追逐或生天上或生人中墮是五道中者皆坐心不端故佛告諸比丘皆當端汝目端汝耳端汝鼻端汝口端汝身端汝心身體皆當斷於土蒐神當不復入泥犁薜荔畜生鬼神中視人家有惡子爲吏所取皆坐心不端故人身

中有百字如車有百名人多貪好怒不思惟身中事死墮泥犁中後悔之無所復及我棄國捐遮迦越王憂斷生死欲使世間人得泥洹道第一精進者立得阿羅漢第二精進者得阿那含第三精進者得斯陀含第四精進者得須陀洹雖不能大精進當持五戒不殺不盜不婬不欺不飲酒佛言人坐起常當思念四事何等四一者自觀人身觀他人身二者自觀痛癢觀他人痛癢三者自觀意觀他人意四者自觀法觀他人法心小欲亂意當自端視人身體飽亦極飢亦極住亦極行亦極寒亦極熱亦極卧亦極卧欲來時當自驚起坐端心坐心不端者當起立立不端者當經行心儻不端者當自正譬如有國王將兵出關健者在前旣在前圖復却退欲却著後

人比丘旣棄家捐妻子剃鬚髮爲沙門雖一世苦後長解脫以得道者內自歡喜視妻如視姊妹視子如知識無貪愛之心常當悲哀十方諸天人民泥犁禽獸辟荔蜎飛蠕動之類皆使富貴安隱度脫得泥洹之道見畋獵當以慈心傷哀之知生不復癡能有是意者常念師恩事佛如人念父母如獄中有死罪囚有賢者往請囚出囚黠慧者常念賢者恩比丘以得道者當念佛如是念經當如人念飯食諸比丘當相承事如弟事兄中有癡者當問黠者展轉相教問黠者如冥中有燈火無得陰謀作惡無得諍訟見金銀當如見糞土無得妄證人入罪法言語無得中傷人意不見莫言見不聞莫言聞行道常當低頭視地蟲無得蹈殺無得貪人婦女無得形相

人婦女坐自思惟去愛貪之心乃得道耳佛告諸比丘欲求道者當端汝心於閑處坐自呼吸其氣息知息短長息不報形體亦極閉氣不息形體亦極分別自思惟形體誰作者心當觀外亦當觀內自思惟歡然與人有異心當是時不用天下珍寶心稍欲隨正道意復小動者即還自守其意意即爲還譬如人有鏡鏡不明不見其形磨去其垢即自見形人去貪婬去瞋恚去愚癡譬如磨鏡諦思惟天下無堅固皆有無常佛告諸比丘持心當如四方石石在中庭雨墮亦不能壞日炙亦不能銷風吹亦不能起持心當如石天下人心如流水中草木各自流行不相顧望前者亦不顧後後者亦不顧前草木流行各自如故人心亦如是一念來一念去如草木前

後不相顧望於天上天下無所復樂寄居天地間棄身不復死道成乃能知師恩見師即承事不見者思惟其教誡如孝子念父母如人念飯食道定便更慈哀天下人民蜎飛蠕動之類坐獨自歎以脫身於天下及五道一者天道二者人道三者畜生道四者餓鬼道五者泥犁道爲羅漢者即能飛行變化身中出水火出無間入無孔欲離世間取泥洹去者即能佛告諸比丘道不可不學經不可不讀佛說經已五百沙門皆得阿羅漢道阿難白佛言是諸沙門聞經意解何其疾也佛言此諸比丘前迦葉佛時受誦斯經中間無佛隨世因緣廢不復聞至今吾爲說聞即得道佛說經竟諸菩薩四輩弟子帝王人民天龍鬼神無不歡喜爲佛作禮

佛說中心經

孝八